

uno cariazo a Cremona, che par li sia stà retenuto, et ha lassato do soi, lo averà. Dice voleva venir di longo e passar per Ferrara sopra il Polesene; ma quando fo a Ferrara, intese nostri erano partiti dil Polesene, et il signor Duca non volse facesse passar le sue zente d'arme de li, e però le mandò a Ravenna. Ha menato fanti 900 in tutto, quali è passà in triviana; e altre particolarità. Dice come il signor Prospero Colona doveva andar in Alemagna, etc.

Da poi disnar, fo Consejo di X con la zonta. Et feno do di la zonta dil consejo di X, uno in luogo di sier Polo Antonio Miani è intrado ordinario, e di sier Alvixe Pixani che intra consier, et rimase sier Domenego Beneto fo consier, e sier Batista Morexini fo podestà a Padoa; soto sier Stefano Contarini fo capitano a Padoa, sier Francesco Bragadin fo savio dil Consejo, sier Bernardo Barbarigo, fo capitano in Candia, qu. Serenissimo, sier Nicolò Venier el governador, e altri tolti. *Item*, feno altre gratie etc.

Di Roma, vene letere questa sera di l'orator nostro, di 25. Come si teniva certissimo che spagnoli dovesse dar danno a li nostri a Lignago, perchè l'orator di Spagna dicea al Papa non potrà esser altramente, et però il Papa desidera ch'el nostro exercito sia salvo; et di Bergamo sempre Soa Santità à dito era mala impresa, perchè non si potea tenir. *Item*, altri colouqui ha auti l'orator nostro con Soa Santità.

Di Franza non vi è letere; *solum* Marco Antonio Colona, come scrisse per le altre di 21, è acordato a' stipendii di Franza con homeni d'arme . . . Et come per avanti scrisse, di 4 cardinali Soa Santità haveva electi legati *pro pace tractanda* a li potentati dil mondo, *videlicet* a l'Imperador Bibiena, Franza Medici, Spagna Surento overo Remolino, che è tutto uno, et Ingaltera Grassis; et vol expedir subito el Bibiena in Alemagna, acciò vedi di acordar le cosse di la Signoria nostra con l'Imperador. E scrive sopra questa materia con altre particolarità, qual, perchè ditte letere si leze nel Consejo di X, non si pol intender; ma per letere particular quello *solum* intesi.

È da saper, ch'el Papa ha concesso in la chixia di San Zane Polo di frati di l'hordine di Predicatori uno grandissimo perdon di colpa e di pena in tre parte di l'anno, *videlicet* tutte le feste di Nadal, tutte le feste di Pasqua, tutte le feste di le Pentecoste, che saranno in tutto zorni nove, come apar per il breve mandato di qui, et fo publicato jovedi ai Frari per il predicator in pergolo, acciò tutti si prepari ad andarvi.

Di Padoa, questa matina letere. A l'usato, i 173 nimici *ut supra* alozati, con fama di levarsi, e fanno le monstre; si dice anderano sopra il Polesene, sono a Montagnana e Cologna.

Fo mandato al signor Renzo ducati 1000 questa sera, perchè lui disse era venuto senza danari; e cussi questi li fo portati, *tamen è solum* con persone, tra le qual el conte Bortolomio di Villa Chiara fiol dil conte Vetur da Martinengo, et uno missier Piero Juvenal romano, e altri, ma questi è li primi. El qual signor Renzo, dal primo zorno indrio, volse andar ad alozar a San Fantino in cha' da Molin, dove stà il suo canzelier domino Francesco da Fiano, qual *etiam* è venuto con lui. *Etiam* fono mandati al signor Bortolomio capitano zeneral nostro ducati 600.

A di 30, Zuoba, la matina. Li Cai di X stetano longamente in Colegio; non fu letere da conto; di Padoa, de i nimici al solito; et dil capitano zeneral, dризate ai Cai di X, zercha questo signor Renzo el la sua venuta et l'opinion sua etc.

Di Chioza, di sier Pangrati Zustinian podestà, di eri. Come el zonzeva homeni d'arme dil signor Renzo a la sfilata, e passavano li porti a Fossion; li quali esso podestà aviava con le barche a Monte Alban.

Di Alexandria, fo letere di sier Tomaxo Venier consolo, di 3 de Octubrio. Zercha quelle ocorentie. Et come l'armata dil signor Soldan, di vele 22 tra galie bastarde e altre, era al Suez compita e tutto in hordine, e partiva per Mar Rosso, et poi in li altri mari contra portoghesi etc. *ut in litteris.*

Fo deputati tre di Colegio ad andar ozi dal signor Renzo, zoè tre Savii dil Consejo sier Cristofal Moro, sier Zorzi Emo, sier Andrea Gritti procurator tutti tre stati proveditori zenerali in campo, et sier Hieronimo Zustinian savio a terra ferma era in setimana, i quali ozi andono dal ditto signor Renzo et parlono insieme.

Da poi disnar, fo Colegio dil Principe, Signoria e Savii, e fono su sier Zuan Ferro proveditor sora i officii, qual vol menar al Consejo di XL Zuan Trivixan di camerlengi: e a l'incontro el dito Zuan Trivixan dicea non era suo officio nè poteva intrometer. Et non fu terminato nulla; sier Zuan Trivisan el consier tolse rispetto, et ozi compie tre consieri, et diman intra li novi etc.